

mort, & ie remercirois Dieu si ie me voyois à la fin de ma vie, dans la ferme esperance que i'ay, que i'irois au ciel: tout de mesme ie n'apprehende plus la mort d'aucun de mes parens, pourueu qu'ils meurent en la grace de Dieu. Lors qu'une ieune femme qui demeure en la maison de son beau-pere, est invitée par son pere de venir passer quelques mois en sa maison, si c'est un homme riche & liberal, le beau-pere s'en réjouit dans la pensée qu'il a que sa bru fera bien à son aise: De mesme si quelq'un de nostre famille mourroit, i'aurois la pensée que Dieu son pere l'auroit tiré dans sa maison, ie m'en réjouirois, puis qu'elle y feroit mieux que chez moy.

9. Souuent sortant de l'oraïson il ne [54] trouuoit point de paroles pour expliquer les sentimens de son cœur, & repetoit plusieurs fois *taouskeheati iatacan*; c'est une chose estrange, mon frere. O qu'il est vray, adioustoit-il, que les hommes n'ont point d'esprit, c'est maintenant que ie commence à cognoistre Dieu. O que n'est-il cogneu! à quoy songent les hommes! & moy qui parle, où estoit mon esprit? comment se peut-il faire qu'on demeure infidele, peut-on pecher apres cela? Il offrit souuent son sang & sa vie pour la conuersion de ses compatriotes, & fit un ferme propos de ne point perdre d'occasion de parler de Dieu, & iamais ne rougir de professer ce qu'il estoit, Chrestien iusques à la mort.

Les iournées luy estoient trop courtes, & souuent il demandoit s'il ne pourroit pas faire les exercices plusieurs fois l'année. En un mot il n'y a point de cœur barbare, mesme dans le plus profond de la barbarie, lors que Dieu veut en prendre la possession. Iesus-Christ n'a pas moins merité de graces aux Sau-